


lian e in ingleize, coscì anche i forèsti peuan inparâ quar-cösa in sce questo bon mangiâ, ch'ò no l'è solo nòstro ma che da niatri o l'â 'na solidiscima tradiçion.

L'otòt, o *cucinosofo*, o l'è 'na garançia; dòppo aveine contòu a stòia da fainâ e de sò varietæ o ne spiega comm'a se fa e o ne da a riçetta pe fala into forno de caza nòstra ascì, ch'a vegne ninte mà.



**Corrado Bozzano, Roberto Pastore e Claudio Serra, *Genova in salita*, Nuova Editrice Genovese, Genova 2014, pagg. 256**

O sototitolo o dixè: *Storia illustrata degli impianti speciali di trasporto pubblico – Funicolari di S.Anna e Righi – Ferrovia Principe-Granarolo – Ascensori – Altri impianti*, e defæti inte questo libro gh'è a stòia, a descriçion e-e figùe de tutti, ma pròpio tutti, i mezzi che n'ân agiutòu e n'agiuttan ògni giorno a mesciase inta nòstra çità ch'a l'è tutta in deschinâ. E funiculari e-e conòscian tutti, en doe, perché quella de Granaieu a l'è 'na ferovia, ma de ascensori ghe n'è in pestasso, contando anche quelli che no fonçion-an ciù e quelli za progetæ, da-i primmi do 1909 a questo secolo; gh'è quello modernizòu de Montegaletto e quello particolare e neuviscimo de Quessi, pe no parlâ do Bigo. Insomma, tantiscime notiçie e imagini da levase tutte e coixità!



**Eugenio Bracco, *Pallone – novanta volte più una*, Genova 2012, pagg. 110**

L'otòt o l'â scrìto questo libro “Pro Casa LUCE”, 'na rexidensa protètta pe ançien a Montezignan. Li sotta gh'è ciassa Adriatico, Longobezagno Istria, Longobezagno

Dalmaçia: no en nommi dæti a caxo, inte quella zòna gh'è stæto mandòu a stâ tante famigge de pròfughi istrien comme quella do Bracco, ch'ò sta de caza senpre li.

Scicomme ch'ò l'è 'n grande apascionòu de balon (inte tutto o libro o scrive **pallone** coscì, in grascetto) e o l'ea ascì in bon zugòu, a cösa a gh'è servia pe integrase inta neuva realtæ dove de corpo, da figeu, o s'è trovòu a dovei vive. Coscì, parlando de balon, o ne conta a seu vitta e l'anima de 'n quartê pöco conosciuo e conscideròu (a parte pe-i alagamenti...), comme pöco conosciua e consciderâ a l'è stæta a vicenda di pròfughi istrien, gente ch'a l'â patio in silençio e ch'a s'è inseria con tanta discreçion tra de niatri che non se ne semmo manco acòrti.



**Christian Roccati e Paolo De Lorenzi, *Villaggi fantasma – Passeggiate su antichi sentieri tra Piemonte e Liguria*, Edizioni del Capricorno, Torino 2015, pagg. 144**

Amiando e fotografie de questo libro, vegne da pensâ che quelle caze seggian abandonæ da secoli, tanto en deruæ e invaze da-a vegetaçion: invece finn-a a-i anni Sciuscianta gh'ea vitta, i moin maxinâvan, o teren d'intorno o l'ea coltivòu e i bòschi no ean insarveghii comme anheu. Pöi, tutt'asemme, o boom econòmico do dòppo goæra o l'â consentio de scangiâ a vitta gramma di contadin di nòstri monti senza stradde con quella ciù bonna di òperai in çità, e l'è finio in mondo. Ma a comoscion che ne piggia amiando e fotografie e, ancon de ciù, andando inte quelli pòsti, a ne fa capì che quello pasòu ghe l'emmo ancon drento, o ne rigoarda e ne fa ben rivixitalo. Quarantedoe schede pe quarantedoe localitæ, co-in pò de stòia e tutte e indicaçioin pe arivaghe..

